

El a elogia ex-minister Marisol pa su iniciativa:

Parlamentario Lainda Westerhoff satisfecho cu aprobacion di fondo europeo pa enseñanza



ORANJESTAD (AAN) – Den conferencia di prensa semanal di fraccion di AVP, Parlamentario sra. Lainda Westerhoff a referi na e fondo di enseñanza cu recientemente a keda aproba den Parlamento.

Parlamentario Westerhoff a señala cu como presidente di e Comision Fiho di Enseñanza, ta hopi esencial pe trece dilanti e importancia cu aworaki a aproba un fondo, cu ta crea un di tres canal cu recursonan financiero ta dreña pa ense-

ñanza.

El a menciona cu manera ta conoci for di gobierno anterior, e minister e tempo ey en-carga cu enseñanza a cuminsa cu e tramitacion y rekisitonan cu mester a cumpli cu nan, pa asina por bin na remarca pa por a haya e placa di fondonan europeo.

E parlamentario a señala cu tabata un caminda largo y no facil pero unda logicamente, mester a cumpli cu rekisitonan y por fin por bisa cu e si-

man aki, Parlamento a aproba e fondo aki.

E fondo ta consisti di un suma di 8.4 milyon Euro, cu lo wordo parti den tres faceta. Esun prome ya caba Aruba a cumpli cune cu ta e entrega di e cuantanan anual, e presupuesto, y un prueba di e crecimiento economico di nos pais. E parlamentario ta menciona cu for di 2007 caba, pero mirando e periodo di gobernacion di Gabinete Mike Eman, di 2009 pa 2012, tin un crecimiento di casi 45 milyon florin cu a wordo inverti den enseñanza loke ta hopi positivo.

Parlamentario Westerhoff a subraya cu e ta kere cu mas cu por inverti den enseñanza ta mas cu bon bini, y el a señala

cu apesar di e schoolnan cu a wordo drecha y renova falta mas ainda y e trabonan aki lo sigui awor cu tin disponible un fondo manera esun europeo.

E suma aki por wordo uza den infraestructura escolar, material, capacitación di maestronan.

Un parti esencial ta cu awendia por scucha hobennan bisa cu nan no ta haya enseñanza atractivo mas, y nan ta kita di school y no tin gana di bay school back.

El a subraya cu un bon docente hasta bao di un mata por duna les, pero e ta kere tambe cu e infraestructura di un edificio escolar, y e tecnologia avanza ta hopi importante.

Parlamentario Westerhoff a agrega cu mundo a moderniza y cosnan ta bay dilanti, y si como gobernante ta papia di un "green conference", of medianan mas avanza cu ta wordo uza den enseñanza, e edificio tambe mester ta adaptá pa e avancen cu tin.

El a remarca cu pa Gabinete Eman tambe ta hopi importante pa inverti den tecnologia, manera sistema IT, y den e ambiente pa haci nos enseñanza hopi atractivo.

Fuera di esaki inverti den renovacion di edificacionan di school, material cu e hobennan mester uza, etc., ta trece un sorto di balansa y un koppel entre enseñanza y e trabonan cu despues por crea afo pa nos hobennan, pasobra nos tin un patronchi, un pakete cu hopi biaha ta haci dificil pa nos hobennan ingresa den e mercado laboral.

Esaki ta un presupuesto cu tin espacio di dos aña pa haci uso di dje, y solamente e minister di enseñanza ta bay tuma decisionnan riba e suma aki y pa ki tipo di proyecto e placa aki lo wordo uza.

E bon di esaki ta, e parlamentario a subraya cu hopi biaha ora mester corta presupuesto un caminda, e ta wordo haci di e carteranan mas grandi cu ta Husticia y Enseñanza, pero cu e fondonan Europeo no por mishi. E parlamentario a subraya cu e aña aki a haci uso di casi 3 milyon florin for di otro fondonan pa inverti den enseñanza, fuera di e fondo nobo aki.

E parlamentario a subraya cu semper e ta kere den continuidad di gobernacionnan y cu mester duna Cesar loke ta di Cesar, y felicita ex-minister Marisol Lopez Tromp cu a bin cu un idea asina innovativo y moderno pa enseñanza, di habri otro canal pa trece mas recurso financiero pa educacion escolar, y cu aworaki bao Gabinete Eman ta logra finaliza e ley aki cu a keda drumi na Parlamento, y cu Parlamento en general a tuma su tempo pa aproba dicho fondo, cu no ta un luho, cu no ta solamente algo adicional pero importante y interesante pa enseñanza den nos pais.